

EAEko eskumenez Joseba Zubiak egin txostena aztertuko dute alderdiek

Estatutuaren Garapenerako Ponentziaren lehen zeregina izango da

Eusko Jaurlaritzako Lehendakariak Sailak konpententziei buruz egindako txostena aztertuko dute Gasteizko Legebiltzarrean ordezkaritza duten alderdiek. Ajuria Eneako Itunak urtarrilean sustatzea erabaki ondoren, ostegunean bilduko da Estatutuaren Garapenerako Batzordea.

GASTEIZ

EAEko Legebiltzarrean ordezkaritza duten alderdi gehienek Estatutuaren Garapenerako Ponentziaren lanei berrekiteko borondatea azaldu zuten atzo, oinarri modura Lehendakariak Sailaren idazkia hartuta. Joseba Zubiak Lehendakariak kontseilariaren zuzendaritzapean egindako txosten honek EAEk beregain hartu dituen 71 konpetentziak eta transferitzeke dauden 55ak aztertzen ditu.

Ajuria Eneako Ituneko alderdiek urtarrileko azken bileran Estatutuaren Garapenerako Batzordea bultzatzeko konpromezua hartu zuten. Batzordea Gasteizko Legebiltzarreko ponentzia gisa osatuko da, hau da, talde parlamentario bakoitzak ordezkaritza bina izanik eta eztabaidak isilpean gordetzeko konpromezua rekin. Ponentzia honek egingo duen bilera datorren ostegunean izango du, aste honetan zehar alderdi guz-



Joseba Zubia.

tiak beren ordezkaritza izendatu ondoren.

Jose Antonio Rubalkaba eta Juan Maria Ollora (EAJ), Jesus Egiguren eta Nicolas Redondo (PSE-PSOE), Juan Porres eta Iñaxio Oliveri (EA), Jaime Mayor eta Leopoldo Barrera (PP), Kepa Aulestia eta Xabier Gurrutxaga (EE) eta Enriqueta Benito (UA) eta Xabier Markiegi (EE) dira ponentzia osatzen dutenak.

ALDERDIEN IKUSPEGI EZBERDINAK Jose Antonio Rubalkaba Gasteizko Legebiltzarreko jeltzaileen eledunak ziurtatu zuen «Gobernuaren lan ona» dagoela, eta be-

✓ **Legegintzaldi berri honetako lehen bilera datorren ostegunean izango da, talde parlamentario guztien ordezkaritzekin.**

rau oinarritzat hartuta «alderdiok ados jar gaitezke transferentzia batzuetan eta besteetan ez».

Jesus Egiguren sozialistak aipatutako txostena aztertzeke borondatea erakutsi zuen, «Gobernuak honi buruz dituen asmoak oztopatzen ez dituen bitartean».

Rafael Larreina EAKo Exekutibako eledunak publikoki eskatu zuen Batzorde honen lanak «ahalik eta azkarren» egiteko. Bere alderdiaren jarrera Estatutuaren «gelditzea» salatzeke bidetik joan litekeela aurreratu zuen.

Jaime Mayor Oreja EAEn PPko lehendakariak Joseba Zubiaren txostena aztertzeke borondatea erakutsi zuen, eta baita «itun autonomikoak Autonomi Elkartearen islada izan dezan ahalik eta akordiorik handiena» lortzekoa ere.

Xabier Gurrutxaga EUEko parlamentariak aurreratu zuen falta diren transferentzien egutegia zehatz dezala eskatuko diola Batzordeari, eta akordio osoa ez dela egongo iritziz. Talde Mistoan, ez EEK eta ezta UAK ez dute erabaki hartuko duten jarrera.


Idigoras: «Gaurko manifestazioa izango da erantzunik gogorrena»

BILBO

Jon Idigoras Herri Batasunako bozeramaleak herritar guztiei deia egin die «Pakea eta Subiranotasuna, Negoziazioaz» aldarrikatzeko gaur Bilboko manifestazioan.

Arratsaldeko bost t'erdietan abiatuko da manifestazioa Basurtutik, autobideko zubipetik (Aita Donostiako plaza) eta udaletxean amaituko da. Diputatuak azpimarratu nahi izan zuen «bakea eta subiranotasunaren aldeko oihuek estali egingo dutela egun hauekako gezur eta difamazio kanpaina». Halaber, jakin erazi zuen «HBren aldetik lasaitasuna eta gogoeta kontrajarriko zaizkio Madril eta Gasteizko gobernuak erakutsi duten histeriari».

HBko eleduna tinko agertu zen egunotan jasandako astinaldia dela zio. «Herri Batasuna eta abertzaleok ez gaude prest urrats bat ere atzera egiteko, subiranotasuna, bakea eta independentziaren errebindikazioan». Josu Muguruza eta Santi Brouarden hilketak gogoratu ondoren zornotzarrak jakin erazi zuen «lehenago ez bagenuen amorerik eman Mahai Nazionalako kideak hil zi-



Jon Idigoras.

tuztenean, askoz gutxiago orain Madrilko kereila edota txantziaren aurrean».

Idigoras konbentzita dago gaurko manifestaziora jendetza bilduko dela, «nahiz eta beldur garen kontrolen bidez saiaturiko ez ote diren jendetza hori murrizten». Herri honetako gero eta lagun gehiak uste du «eledunaren iritziz» «negoziazioaren bidea dela aukera bakarra bakea eta subiranotasuna lortzeko».

Bilboko Udalaren zorra estaltzen lagunduko du Bizkaiko Diputazioak

M.A. / BILBO

Bilboko Udalak 1991ko ekitaldiaren bukaeran izan duen 3.621 milioi pezetako (202 milioi libera) defizita estaltzeko Bizkaiko Diputazioaren 2.400 milioi pezeta inguruko (134 milioi libera) laguntza jasoko du, atzo Josu Ortuondo Bilboko alkateak eta Jose Alberto Pradera Bizkaiko diputatu nagusiak aditzera eman zuten.

Ortuondok azaldu zuenez, «Diputazioaren laguntzaren ondoren geldituko den defizita beste instituzioekin ditugun harremanekin estaltzea espero dugu, Udalaren kontuak 0 puntuan jarritz». Bilboko alkateak jakin eazi zuenez, defizita kendu ondoren 1992-1995 eperako Bideragarritasun Plangintza jarriko dute martxan, «diruaren gestio eraginkorrerago» lortzeko helburuarekin. Oraindik bukatzeke dagoen plan-

gintzaren arabera, arreta berezia jarriko dute udal agintariak gastuen kontrolean, zergak kobratu eta iruzurraren aurkako neurrietan.

Bizkaiko Diputazioak 1991n aurrirakusten zuena baino 4.600 milioi pezeta (256 milioi libera) gehiago bildu ditu. Dirutza honetatik aterako da Bilboko Udalari egingo zaion 2.400 milioi pezetako aportazioa. Beste 1.000 milioi pezeta (56 milioi libera) Bizkaiko udalen artean banatuko du Diputazioak eta gainontzekoa Gasteizko Gobernuak jasoko du.

Zentzu honetan Ezkerraldeko alkateak egin duten protestak «politikoak» direla adierazi zuen Praderak. Ortuondoren iritziz «bidegabea litzateke Diputazioaren dirua biztanle kopuruaren arabera banatzea udaltan, Bilbok kapital modura hainbat zerbitzu eskaini behar baitu eta ez bereziki bertako hiritarrei zuzendutakoak».

Gipuzkoako Batzarretako lehendakariaren dimisioa eskatuko dute EA, HB eta EUEk

DONOSTIA

Josu Esnal, Gipuzkoako Batzar Nagusietako lehendakariak aurrekontu eztabaidaren inguruan hartu duen erabakia gaitzetsi eta bere dimisioa eskatu dute EA, HB, eta EUEk, oposizio alderdiek. Eskaera hau Batzar Nagusietako batzorde iraunkorrera eramango dute eta bertan bozkatzeko nahi dute.

Gipuzkoako Diputazioak aurkeztu duen aurrekontu proiektuari osoa-rikiko emendakinak aurkeztu dizkiote oposizio alderdi nagusi

hauek, eta Hazienda batzordean eztabaidatzen direnean atzera botatzeko asmoa erakutsi dute, bozketa bakar baten bidez. Josu Esnalek orde, eztabaida talde bakoitzaren emendakina banan banan bozkatzeko asmoa erabaki zuen joan den asteartean, eta ez atzera botatzen diren edo ez.

Arautegiak aukera hori aurrirakusten du eta errespetatu egin behar dela diote EA, HB eta EUEk, Esnalek beste irakurketa bat egin zuen arren. «Presidenteak bere aldetik bakarrik hartu duen erabakia» gaitzestea es-

kutzen dute, «batzorde iraunkorraren gehiengoaren iritzia eta borondatearen aurka inposatutako erabakia delako».

EAJ eta PSE alderdiek gutxiengoan gobernatzen dute Diputazioan eta Esnalek «gobernu horren interes partidisten zerbitzuan» jokatu duela uste dute.

«Batzorde iraunkorrak Diputazioarekiko behar duen independentziaren aurkako portaera izan du presidenteak, eta bere dimisioa eskatzen dugu» dio hiru alderdiek atzo aurkeztu zuten idazkian.

BIDAL EZAZU ZEURE POSTA-TXARTELA

HARTZAILE

JOSE MARIA ALVAREZ DEL MANZANO
Madrileko Alkatea
Plaza de la Villa, 5
28071 MADRIL

TEXTU

Euskaldunok ez dugu inor txantaiatu nahi gutxi batzuen basatikeriagatik. Geure izenean kanpora eramaten dituzten heriotza eta min hoiek gaitzesten ditugu. Adieraz iezaiezu madrildarrei haiekin batera gure egiten ditugun haserre eta urrikia.



EUSKAL HERRIKO GIZA ESKUBIDEEN ALDEKO ELKARTEA
Alda. Rekalde, 6, 1.º - Tfnoa. 423 58 48 - 48009 BILBAO

BILBO: (94) 423 58 48
424 30 10 - 415 32 85

**ORAIN
EZ GARA
ISILDUKO**



GIZA ESKUBIDEEN BIOLENTZIAREN AURKA